

ՊՈՒՇՅԱՆՆԵՐԻ ՏՈՂՄԱԿԱՆ ԶԻՆԱՆՇԱՆԸ ԵՎ ՆՐԱ ՊԱՏՄԱԾԱԳՈՒՄ-
ՆԱԲԱՆԱԿԱՆ ՎԵՐԼՈՒԾՈՒԹՅՈՒՆԸ

Ռ. Ի. ՄԱԽԵՎՈՍՅԱՆ

Հայկական միջնադարյան հերալդիկան (զինանշաններ) դեռևս ուսումնասիրված չէ: Հին հայկական ֆեոդալական տոհմերից մի մասի հերալդիկ նշանները նույնիսկ ճշտված չեն, ստույգ հայտնի են միայն XII—XIV դդ. մի քանի ազդեցիկ տների զինանշաններ (Պոռոյանների, Դսեղի Մամիկոնյանների, Վաչուտյանների), որոնք պահպանվել են տոհմական պաշտամունքային կառույցներում, ձեռագրերում և այլուր:

Զինանշանների վատ ուսումնասիրված լինելը պետք է համարել մեր պատմագիտության թերի կողմերից մեկը, որովհետև զինանիշագիտությունը հանդիսանում է օժանդակ պատմական գիտություն և լրացուցիչ ու հաճախ կարևոր տեղեկություններ է հաղորդում անցյալի քաղաքական-մշակութային կյանքի իրադարձությունների մասին, նպաստում նրանց համակողմանի լուսարանմանը:

Դրավոր սկզբնաղբյուրները, ցավոք, շատ քիչ տեղեկություններ են հաղորդում հայկական հերալդիկ նշանների մասին, մեր պատմիչները չեն տվել նշանների նկարագրությունը (բացառություն է կազմում, թերևս, Փավստոս Բուզանդի հակիրճ հաղորդումը Մամիկոնյանների զինանշանի մասին): Նրանք հաճախ նշում են դրանց (հայերի մոտ ընդունված արտահայտությամբ՝ «նշանակներ») առկայությունը միայն: Այդ վկայությունները պարզորոշ հաստատում են, որ ինչպես մյուս երկրներում, այնպես էլ Հայաստանում, ֆեոդալական տոհմերը կամ նրանց առանձին տները ունեցել են սեփական զինանշաններ, դրոշներ և այլ տարրերիչ նշաններ: Այդ տեսակետից առանձնապես արժեքավոր են IX—X դդ. պատմիչ Քովիմ: Արծրունու տեղեկությունները¹:

Այլ երկրներում, Եվրոպայում, Ռուսաստանում միջին դարերում, հատկապես ուշ միջնադարում, կազմվում էին հատուկ գրքեր (Титулярник), ուր տրվում էր տարբեր ազնվական տների զինանշանների նկարագրությունը: Դա շատ է հեշտացնում այդ երկրների հերալդիկայի ուսումնասիրությունը: Հայաստանում առայժմ այդպիսի գրքեր չեն հայտնարևրվել, ուստի ուսումնասիրությունը հիմնականում պետք է կատարվի հուշարձանների վրա (մասամբ նաև ձեռագիր գրքերի մասնակարներում) պահպանված նշանների վերլուծությամբ, հիմք ունենալով սվլյալ տոհմի պատմական անցյալը և առնչությունը երկրի քաղաքական-մշակութային կյանքին²:

¹ Քովիման հետաքրքիր տեղեկություններ է հաղորդում ֆեոդալի տոհմական տարրերիչ նշանների (ատրիրատիկայի) մասին: 849 թ. արաբ ոստիկանի դեմ կռվելու համար Վասպուրականի իշխան Աշոտ Արծրունին «այտարարել էր զորահավաք, որին ներկայացել էին նրա վասալ իշխանները (Արծրունյաց տոհմի տարբեր ճյուղերի և այլ տոհմերի՝ Ռշտունիների, Տրունիների և մյուսների ներկայացուցիչները): Պատմիչի խոսքերից պարզ երևում է, որ նրանցից յուրաքանչյուրը ուներ իր «նշանը» (գերբը), զրոշը և այլ տարրերիչ խորհրդանիշեր: «Ճամագունդ ժողով առնելը ամենայն աշխարհին և ամենայն նախարարք Վասպուրական տէրութեան... դունդ առ գունդ ընդդեմ միմեանց կազմելին, և փողքն գռչելին և դրոշքն տարածանելին և նշանքն փողփողելին...» (տե՛ս Քովիմի Արծրունյաց Պատմութիւն տանն Արծրունեաց. ՍՊԲ, 1887, էջ 109, 110. տե՛ս նաև էջ 125, 126, 144, 147, 150):

² Ֆեոդալական իշխանության անկման և տոհմի ասպարեզից հեռանալուց հետո հաճախ զինանշանների կոմպոզիցիան օգտագործվում էր որպես զարդարանք նոր կառուցվող աշխարհիկ և կրոնական շինություններում, դառնում դեկորի տարր: Նման տարրերի հայտնաբերումը և վերլուծությունը հայկական հերալդիկայի ուսումնասիրման եղանակներից մեկն է:

Էրալդիկ նշաններ հիմնականում պահպանվել են X—XIII դդ. կառուցած հուշարձաններում: Նրանցում կարևոր տեղ ունի Գեղարդա վանքը, որի կառույցներից մեկում պահպանվել է Պոռոյան տոհմի զինանշանը (գերբը):

XII դարի վերջում—XIII դարում Պոռոյանները Հայաստանի ամենազղևացիկ ֆեոդալական տներից էին (որոշ ժամանակ երկրորդը Ջաքարյաններից հետո), և մեծ դեր էին կատարում երկրի քաղաքական ու մշակութային կյանքում: Կեղարդը նրանք գնել էին Ջաքարյաններից, իսկ 1283 թ. Պոռո իշխանը կառուցել էր ժայռակոփ եկեղեցի, որի գավիթը ծառայել է որպես տոհմական դամբարան: Այստեղ էլ քանդակվել է Պոռոյանների զինանշանը: Մեծ է այդ նշանի արվեստագիտական և պատմաաղբյուրագիտական արժեքը: Նա որոշակիորեն օգնում է Պոռոյանների պատմության մի քանի կարևոր հարցերը, այդ թվում նրանց ծագումնաբանությունը պարզաբանելուն:

Պատմական օժանդակ գիտությունների (տվյալ դեպքում հերալդիկայի) տվյալների հետ միասին, խնդրո առարկան ուսումնասիրելու համար, անկասկած, առաջնային նշանակություն ունեն գրավոր աղբյուրների տեղեկությունները, որոնք մենք քննության ենք առել առանձին և դրանց օգնությամբ եզրակացրել ենք, որ Պոռոյանները ոչ թե առանձին ֆեոդալական տոհմ էին, այլ սերել են Մամիկոնյանների Տաշիրի տոհմաճյուղից: Առանձնացումը տեղի է ունեցել XII դարի վերջում³:

Պոռոյանների զինանշանի, նրա կոմպոզիցիայի պատմական ակունքների պարզումը գալիս է լրացնելու և հաստատելու գրավոր աղբյուրների տվյալները: Կոմպոզիցիան բարդ կառուցվածք ունի, այն բաղկացած է երեք բաղադրիչներից: Կենտրոնում զետեղված է արծիվ, որը ճանկերում բռնել է ինչ-որ կենդանի (հավանաբար գառնուկ): Դա գլխավոր տարրն է: Արծիվի երկու կողմերում տեղավորված են առյուծներ, որոնք միմյանց հետ կապված են շղթայով: Դա կոմպոզիցիայի երկրորդ բաղադրիչն է: Վերջապես, երրորդ տարրը ցուլի գլուխն է, որը տեղադրված է քանդակի վերնամասում:

Ոչ մի կասկած չկա, որ նկարագրված քանդակը հանդիսանում է Պոռոյանների զինանշանը: Սակայն նրա կոմպոզիցիան ունի իր կրկնօրինակը մեկ այլ ֆեոդալական տոհմի հերալդիկ նշանում: Նկատի ունենք XII—XIV դդ. Տաշիր գավառի տերեր Մամիկոնյանների զինանշանը, որը (երկու տարբերակով) առկա է Դսեղ գյուղի միջնադարյան հուշարձաններում:

Նշված դարերում Դսեղը Մամիկոնյանների իշխանության քաղաքական կենտրոնն էր, նրանց «տէրի» նստավայրը, այնտեղ էլ գտնվում էր եկեղեցական թեմի գլխավոր վանքը՝ Բարձրաքաշի Ս. Գրիգորի: Վանքը հիմնվել է 1221 թ. (Աստվածածին եկեղեցի), 1259 թ. կառուցվել է գավիթը, որի հարավային պատի արտաքին կողմից քանդակված է Մամիկոնյանների զինանշանը՝ երկգլխանի արծիվը, ճանկերում կենդանի, իսկ նրա ներքևում՝ գիրք է (նկ. 1): Քանի որ Գեղարդի քարակոփ եկեղեցին կառուցվել է ավելի ուշ, սուրբման Պոռոյանների զինանշանի կոմպոզիցիան արդեն հայտնի էր այլ տոհմի հերալդիկ նշանից:


Բայց նշված հերալդիկ նշանը Դսեղում հանդիպում է ավելի վաղ ժամանակաշրջանից: Գյուղի համարյա կենտրոնական մասում (ներկայումս Հովհաննես Թումանյանի տուն-թանգարանի մոտակայքում) պահպանվել է մի ավելի հին կիսավեր կառույց, որը համարվում է VII դարի եկեղեցի⁴: Նրա արևելյան պատի ճակատին քանդակված է մեզ հայտնի հերալդիկ նշանը՝ երկգլու-

³ Տե՛ս Պոռոյան ֆեոդալական տոհմի ծագումնաբանությունը.—«Լրաբեր հասարակական գիտությունների», 1986, № 11, էջ 65—70:

⁴ Տե՛ս Է. Ծ ո ի ա ղ ա ղ յ ա ն. Դսեղի բարձրաքաշ Ս. Գրիգորի և Քառասնից մանկանց վանքերը և գյուղի մյուս առավել կարևոր հուշարձանները և դրանց վիմագիր արձանագրությունները.—«Էջմիածին», 1971, № 1, էջ 38: Եկեղեցու նախնական ձևը եղել է կենտրոնազրմբեթ, խաչաձև հատակագծով, ուղղանկյուն խաչքներով, որը բնորոշ է VII դարին: Հետագայում ռոյ շենքը քանդվել է, կանգուն է մնացել միայն արևելյան թևը, որը հին եկեղեցու արևելյան արտիզն է: XIX դարում նրան կից կառուցվել է նոր սրահ, որպես գործող եկեղեցի (նույն տեղում, էջ 42):

խանի արծիվը, ճանկած մի գառնուկ: Չախ կողմից առյուծ չկա, բայց այստեղ նույնպես պետք է լիներ, որովհետև հակառակ դեպքում կոմպոզիցիան կորցնում է իր համաշափուլությունը:

Մամիկոնյանների գերբը իր երկու տարբերակներով ունի խոր պատմական արմատները: Արծիվը Մամիկոնյանների զինանշանն էր դեռևս IV դարում, այդ մասին վկայում է Փավստոս Բուզանդը: Մամիկոնյանների մասին պատմիչը գրում է. «Աղանազգիք աղանադրօշք արծուանշանք, վարժնականիշք աներկիւղք քաշասիրտք...»⁵:



Նկ. 1

Վենետիկի Մխիթարյան Վ. Հացունին, որը աշխատություն է գրել հայկական դրոշմների մասին, մեկնաբանելով այս վկայությունը, աղանազգիք» բառը համարում է գրչական սխալ: Այդ նույն հատվածը պարունակում է նաև X դարի մատենագիր Մեսրոպ Երեցի աշխատությունը: Մեսրոպի երկում գրված է. «Աղեղնաձիգք, արծուենշանք, աղեղնադրօշք»⁶: Վ. Հացունին հետևություն է անում, որ «հոս աղեղնաձիգք գեղեցկապես կ'ուղղէ նախորդին աղանազգիքը» և եզրակացնում է, որ Մամիկոնյանների դրոշի վրա պատկերված էր նետընկեց աղեղ⁷: Բացի այդ, նրա կարծիքով, դրոշի վրա պատկերված էր նաև արծիվ, Փավստոսի նշած «վարժնականիշք»-ի արմատն է վարուժան (վարուժնակ, վարժնակ) բառը, որը նշանակում է արծվի և այլ թռչունների արուն: Պատմիչի գործածած «արծուենշանք վարժնականիշք» բառերը Հացունին համարում է հոմանիշ բառեր արու արծվի իմաստով⁸: Հիմնը վերլուծվ Փավստոսի այս վկայության վրա, Հացունին վերականգնում է Մամիկոնյանների դրոշի պատկերը՝ ճանկերի մեջ աղեղ բռնած արծիվ⁹:

⁵ Փավստոսի Բուզանդացույ Պատմութիւն Հայոց. Երևան, 1987, էջ 106:

⁶ Տե՛ս Պատմութիւն ս. Ներսիսի Պարթևի հայոց հայրապետի.—Սոփերք հայկականք, հ. 2, Վենետիկ, 1853, էջ 17:


⁷ Տե՛ս Հայ դրոշմները պատմութան մեջ, գրեց Վարդան Հացունին. Վենետիկ, 1930, էջ 59:

⁸ Նույն տեղում, էջ 62: Հացունին վկայություն է Թովմա Արծրունու պատմությունից մի հատված, ուր Դերենիկ Արծրունի իշխանը մեծարվում էր որպես սքաշազգի Վարուժանն... զբարձրաթիւ արծիվն» (Թովմա Արծրունի, էջ 299):

⁹ Վ. Հացունի. Նշվ. աշխ., էջ 63: Նմանատիպ կոմպոզիցիա տարածված էր հին աշխարհում (Սեյկյունների, Պաղոմյանների, Անտիոքի, Նախաարչակունյաց Հայաստանի դրամներում. տե՛ս նույն տեղում):

Վ. Հացունու կողմից Մամիկոնյանների դրոշի պատկերի վերականգնումը, մեր կարծիքով, միանգամայն համոզիչ է: Պետք է ավելացնենք, որ Փավստոսի «արծուանշանք» արտահայտությունը վկայում է, որ նույն տոհմի «նշանը» (գերբը) նույնպես պատկերում էր արծիվ: Այդ են հաստատում Զվարթնոցի տաճարի խոյակների արծվի հերալդիկ նշանները, որոնք Մամիկոնյանների «նշաններն» են. հայտնի է, որ Զվարթնոցի կառուցողն էր ներսես Շինարար կաթողիկոսը, որը սերում էր Մամիկոնյանների տոհմից¹⁰: Սակայն Զվարթնոցի արծիվը ճանկերում կենդանի չի պահում: Ըստ երևույթին, կոմպոզիցիոն այդ լուծումը արված է գիտակցաբար (արծվի պատկերը քանդակված է խոյակի ամբողջ բարձրությամբ, մյուս մասի համար տեղ չի մնացել):

Փավստոս Բուզանդի մեջբերված հաղորդումը ցույց է տալիս, որ Դսեղ գյուղի պաշտամունքային կառույցների հերալդիկ նշաններն ունեն պատմական իմք, նրանց կոմպոզիցիայի ակունքները հասնում են մինչև IV դարը: Սակայն ժամանակի ընթացքում կոմպոզիցիան կրել է որոշակի փոփոխություն՝ աղեղը փոխարինվել է կենդանու, իսկ VII դարից՝ արծվի պատկերով, որը ճանկող է¹¹:



Նկ. 2

Ժամանակագրական կարգով հաջորդ (մեզ այժմ հայտնի) հուշարձանը, որը ունի ճանկող արծվի քանդակ, Անիի պալատական եկեղեցին է: Նրա երկու հարթ որմնասյուների վրա քանդակված են արծիվներ՝ ճանկերում կենդանի բռնած (Նկ. 2): Ն. Մառը այս եկեղեցին թվագրում է նախաբազրատունյաց շրջանով, երբ Շիրակն ու Անին պատկանում էին Կամսարականներին¹²: Սակայն ի՞նչ պատճառով Կամսարականների եկեղեցում պետք է քանդակվեր Մամիկոնյանների հերալդիկ նշանը, առայժմ մնում է անհասկանալի, զուցե դրանում դրսևորվել են Կամսարականների և Մամիկոնյանների սերտ կապերը:

Մամիկոնյանների զինանշանի կոմպոզիցիան անցել է Պոռոջաններին, դա պարզ երևում է երկու տոհմերի վանական կառույցների հերալդիկ նշաններից: Սակայն Պոռոջանների մոտ հորինվածքը մասնակի փոփոխություն է կրել՝ ավելացվել է ցուլի գլուխը, իսկ առյուծները միմյանց հետ կապվել են շղթայով:

Պոռոջանների զինանշանը հանդիպում է նրանց իշխանության սահման-

¹⁰ Պատմութիւն Սևրէոսի, աշխատութեամբ Գ. Արզարյանի. Երևան, 1979, էջ 166:

¹¹ Կոմպոզիցիայի մանրամասների ձևափոխումը տարածված երևույթ էր միջնադարյան հերալդիկայում: Բնորոշ օրինակներից է Նովգորոդի գերբը Ռուսաստանում: Նրանում պատկերված էր վեշի ջենքը, որին հենած էր զավազանը (Նովգորոդի բոյարական հանրապետություն. XV դար): Հետագա դարերում ուսական կենտրոնացած պետությանը միացվելուց հետո, գերբը փոփոխվել է: Շենքը վերածվել է դահի, որի երկու կողմերից ավելացվել են արջեր: Դա արդեն միապետական գերբ է: Տե՛ս А. Арциховский. Древнерусские областные гербы.—Ученые записки Московского государственного университета им. Ломоносова. Вып. 93, История, кн. 1. М., 1946, с. 49—51.

¹² Տե՛ս Н. Марр. Ани. Ереван, 1939, с. 95, 96. Պալատական եկեղեցու մասին տե՛ս Նան՝ Ս. Մեացակասյան. Հայկական աշխարհիկ պատկերաքանդակը. Երևան, 1976, էջ 19—22:

ներում կառուցված շատ վանքերում և այլ շինություններում (օր.՝ Թանահատի վանք, Գոմեր գյուղի մատուռ, Կեչառիսի վանք, Թանաաի եկեղեցի, Մարաթուս գյուղի եկեղեցի և այլուր): Բայց բոլոր դեպքերում չէ, որ հերալդիկ նշանը պարունակում է երեք բաղադրիչները: Հաճախ առկա է միայն զինանշանի գլխավոր տարրը՝ ճանկող արծիվը:

Կոմպոզիցիայի երեք տարրերը առկա են Մարաթուս գյուղի եկեղեցում (ՀՄՍՀ Ազիզբեկովի շրջան), որը այժմ կիսավեր է: Եկեղեցին կառուցվել է XIII—XIV դդ. սահմանագլխին (կա 1308 թ. արձանագրություն), արևելյան պատին բարձրաքանդակ հերալդիկ նշան է եղել՝ ճանկող արծիվ (կենտրոնում), ցուլի գլուխ (ձախից) և առյուծի դունչ (աջից), (նկ. 3): Այժմ բարը հանված է տեղից և դրված է առանձին¹³:

Նույն շրջանի Գոմեր դյուզում գտնվում է մատուռ, որը ունի 1263 թ. արձանագրություն: Նրանից հայտնի է, որ մատուռը կառուցվել է Պոռո իշխանի օրոք, կառուցողներն են Մխիթարն ու նրա կին Արևիկը: Մատուռին կից նրանք կանգնեցրել են մեծ խաչարար¹⁴, որը միաժամանակ մատուռի արևմտյան պատն է հանդիսանում: Խաչի տակի մասում քանդակված են ցուլ և առյուծ, իսկ մատուռի ճակատին՝ ճանկող արծիվ (նկ. 4): Շղթայակապ



նկ. 3



նկ. 4

առյուծներ պատկերված են Գլաձորում 1318 թ. գրած մի ձեռագրում¹⁵ (նկ. 5), իսկ Գլաձորը Պոռոյանների իշխանության մշակութային կենտրոններից մեկն էր:

Այսպիսով, Մամիկոնյանների և Պոռոյանների զինանշանի ընդհանուր բաղադրամասերն են ճանկող արծիվը և առյուծները: Առյուծները կոմպոզիցիայի լրացուցիչ ֆիգուրներ են: Նախորդ դարերի հայկական հերալդիկայում օգտագործվում էին այդպիսի լրացումներ. օրինակ՝ Կամսարականների զինանշանում ցուլի գլուխը երկու կողմից որպես «պաշտպաններ» ուներ վիշապներ¹⁶, իսկ Պոռոյան-Մամիկոնյան զինանշանում պաշտպաններն են առյուծ-

¹³ Գ. Հովսեփյան. Խաղրակյանք կամ Պոռոյանք հայոց պատմության մեջ. Անթիլիսս, 1969, էջ 23, 24: Материалы по археологии Кавказа. Вып. XIII, М., 1916, с. 153.

¹⁴ Մատուռի մասին և նրա լուսանկարը տե՛ս Материалы по археологии Кавказа. Вып. XIII, с. 155: Տե՛ս նաև Գ. Հովսեփյան. Նշվ. աշխ., էջ 23, 24, 72:

¹⁵ Մաշտոցի անվ. Մատենադարան, ձեռ. № 206, թ. 461: Հմմտ. Գ. Հովսեփյան. Նշվ. աշխ., էջ 272:

¹⁶ Н. М а р р. Указ. соч., с. 95, 109.

ները: Յուլի գուլսը ավելի է ուժեղացնում նշանի տպավորությունը. մեր կարծիքով Պոռչյանները Գեղարդում օգտագործել են Կամսարականների հերալդիկ նշանը, որպեսզի ավելի ընդգծվի նշանի ընդհանուր արտահայտչականությունը: Յուլի բերանում օղակ է, որին և միանում է երկու առյուծներին շաղկապող շղթան: Նման օղակ կա նաև Աղթամարի քանդակներից մեկում՝ այն բերանում են պահում երկու արծիվներ: Հ. Օրբելու կարծիքով, դա Արծրունիների զինանշանն է, իսկ օղակը իշխանի տիրության խորհրդանշան է¹⁷:



Նկ. 5

Միանգամայն հավանական է, որ նույն ֆունկցիան կատարում է օղակը Պոռչյանների զինանշանում, իսկ շղթան միմյանց է կապում կոմպոզիցիայի բոլոր տարրերը:

Այսպիսով, Պոռչյանների զինանշանը, որը ստեղծվել է XIII դարի երկրորդ կեսին, երբ այդ տոհմը արդեն մեծ ազդեցություն ուներ երկրում, հին հայկական հերալդիկ նշանների յուրատեսակ «հավաքորդ» է:

Ն. Մառը նշում է, որ հերալդիկ նշանների համար առյուծները կամ արծիվները օգտագործվում էին հին, նույնիսկ տոհմատիրական Հայաստանում: Այդ դարաշրջանների համար դժվար է գտնել զբաղվող վկայություններ¹⁸: Հենց այդ առումով էլ XIII—XIV դդ. հերալդիկ նշանները մեծ պատմամշակութային արժեք են ներկայացնում, որովհետև նրանցում հաճախ օգտագործվել են

¹⁷ Տե՛ս Ի. Օրբելի. Избранные труды. Т. 1, М., 1968, с. 121—124.

¹⁸ Ի. Մառ. Указ. соч., с. 95.

ավելի վաղ շրջանի՝ IV—VIII դդ. իշխող հայկական ֆեոդալական տների գերբերի տարրեր թաղադրամասերը:

XII—XIV դդ. հերալդիկ նշանների քննությունը և նրանցում վաղազույն տարրերի հայտնաբերումը հնարավորություն կտա վերականգնելու Արշակունյաց և Բագրատունյաց շրջանների ֆեոդալական անների հերալդիկան: Դրանում առանձնակի արժեք ունի Պոռշյանների ղինանշանի բարձրաբանդակը Գեղարդում:

Գալով Պոռշյանների և Մամիկոնյանների ազդակցական կապերի հարցին, պետք է եզրակացնել, որ երկու առհմերի հերալդիկ նշանները արտացոլում են Մամիկոնյան տոհմի ճյուղավորման պրոցեսը, որի հեռանկարով առաջ եկավ ֆեոդալական նոր իշխանություն և ազդանուն: XIII դարում Պոռշյաններն արդեն ինքնուրույն առհմ էին, ընդհանուր շրջան չէին կարել կապերը մայր տոհմի հետ: Դրանով էլ պայմանավորված էր երկու առհմերի հերալդիկ կոմպոզիցիաների ընդհանրությունը¹⁹:

РОДОВОЙ ГЕРБ ПРОШЯНОВ И ЕГО ИСТОРИКО-ГЕНЕАЛОГИЧЕСКИЙ АНАЛИЗ

Р. И. МАТЕВОСЯН

Резюме

Армянская средневековая геральдика изучена недостаточно. В письменных источниках содержится мало сведений о геральдических знаках. Гербы сохранились в основном на культовых сооружениях X—XIII вв. и в некоторых рукописях. Большую ценность представляет герб рода Прошянов, который был высечен в родовой усыпальнице при пещерной церкви (построена в 1283 г. князем Прошем). Здесь сложная композиция: когтящий ягнёнка орел, по бокам которого львы. Венчае: композицию голова быка. Подобную композицию (отличие лишь в деталях) имеет герб рода Мамиконянов, высеченный в церкви села Дсех в монастыре св. Григоря Бардзракаш. Это сходство не случайно. Общие геральдические композиции двух родов подтверждают свидетельства письменных источников о том, что Прошяны являются побочной ветвью феодального рода Мамиконянов.

¹⁹ Պետք է նշել, որ XII—XIII դդ. Պոռշյանները կոչվում էին «Խաղբակենք» (տե՛ս Գ. Հովսեփյան. նշվ. աշխ., էջ 304, 305, 308, 309), իսկ Պոռշյան անունը տրվել է նոր մամանակներում: